

Na osnovu člana 138. stav 2. i člana 144. stav 3. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03 i 21/09), Dom naroda Parlamenta Federacije Bosne i Hercegovine je na 24. vanrednoj sjednici, održanoj 23.5.2014. godine, nakon razmatranja Informacije o posljedicama prirodne nesreće i prijedloga mjera za njihovo saniranje usvojio sljedeće:

ZAKLJUČKE

1. Dom naroda Parlamenta Federacije Bosne i Hercegovine zahtijeva od Vlade Federacije Bosne i Hercegovine i svakog ministarstva Federacije Bosne i Hercegovine, javnih preduzeća, uprava i agencija u Federaciji Bosne i Hercegovine da odmah i prioritarno, u okviru svojih nadležnosti, poduzmu neophodne mjere saniranja posljedica prirodne nesreće u Federaciji Bosne i Hercegovine, te izrade nove planove sistema zaštite od prirodnih nesreća i dostave ih Parlamentu Federacije Bosne i Hercegovine.
2. Zadužuje se Vlada Federacije Bosne i Hercegovine za koordinaciju pomoći ugroženim područjima, s ciljem najdirektnije suradnje sa vladama kantona na ugroženim područjima. Držimo nužnim da treba posebno definirati kratkoročne i dugoročne mjere oporavka i revitalizacije poplavama ugroženih područja.
3. Dom naroda podržava inicijativu Predstavničkog doma Parlamenta Federacije Bosne i Hercegovine kojom traži od Agencije za bankarstvo Federacije Bosne i Hercegovine i svih banaka koje posluju na području Federacije Bosne i Hercegovine da za sva pravna i fizička lica koja su nastradala i pretrpjela štetu u poplavama koje su se desile u proteklom periodu urade reprogramiranje kreditnih obaveza za ta lica i poduzetnike u otplati glavnice kredita za najmanji rok od godinu do dvije godine i da se otplata kredita pomjeri za naredne dvije godine. Predlaže se Parlamentu Federacije Bosne i Hercegovine da zatraži od Vlade Federacije Bosne i Hercegovine da Odluku o raspodjeli sredstava o GSM licenci stavi van snage, te da se izvrši revizija te odluke u smislu da se sredstva usmjere na poplavljena područja.
4. Radi što uspješnijeg organiziranja donatorske konferencije sa međunarodnim predstavnicima, pozivamo sve nivoe vlasti na što konkretniju suradnju radi dobivanja neophodnih finansijskih sredstava za obnovu pogođenih područja.
5. Tražimo da se izvrši prenamjena značajnog dijela sredstava predviđenih za programe poticaja poljoprivredne proizvodnje i usmjeri u sanaciju šteta i obnovu poljoprivredne proizvodnje na ugroženim područjima.
6. Zadužuje se Vlada Federacije Bosne i Hercegovine da mjesečno informira Dom naroda Parlamenta Federacije Bosne i Hercegovine o pruženoj pomoći i sanaciji šteta u ugroženim područjima. Predlaže se Domu naroda da se ova informacija razmatra kao 1. tačka dnevnog reda svake naredne sjednice kako bi se osigurala transparentnost pri dodjeli pomoći i spriječila zloupotrebe.

7. Zadužuje se Vlada Federacije Bosne i Hercegovine da u roku deset dana od dana usvajanja ovih zaključaka pripremi po hitnom proceduri Prijedlog Zakona o osnivanju Fonda za elementarne nepogode Federacije Bosne i Hercegovine.
8. Traži se od policijskih i inspeksijskih organa u Federaciji Bosne i Hercegovine da spriječe svako moguće profiterstvo i zloupotrebu nastale situacije.
9. Preporučuje se nadležnim organima da razmotre mogućnost dodjele građevinskog zemljišta bez naknade u područjima u kojima je uništena imovina građana.
10. Kolegij Doma naroda preporučuje da se iz obračunate plaće za mjesec svibanj izdvoji iznos od 10% primanja delegata, te da se ta sredstva uplate na račun Fonda ili po izboru delegata kao pomoć licima iz ugroženih područja.
11. Ovi zaključci bit će objavljeni u "Službenim novinama Federacije BiH".

DN broj: 02-02-645/14
23. maja 2014. godine
S a r a j e v o

PREDSJEDAVAJUĆI
DOMA NARODA
PARLAMENTA FEDERACIJE BIH

Tomislav Martinović